

■ PRO SVIZRA RUMANTSCHA

2017: Onn giubilar e da blera lavur

(anr/gc) 2017 ha la Pro Svizra Rumantscha (PSR) pudì festivar il giubileum da 25 onns. Ella ha fatg quai en connex cun sia radunanza generala. Suenter las tractandas statutaricas ha ella preschentà divers projects per l'avegnir da la Rumantschia. Quai è succedì sut ils cavazzins: represchentaziun, deliberaziun ed infurmaziun ch'èn alur vegnids discutads intensivamain.

Postulà è ina giada vegnì: ina represchentaziun en furma d'ina cumissiun da linguas. Sin iniziativa da la PSR ha cuss dals chantuns, *Stefan Engler*, inoltrà ina moziun en il parlament federal per crear ina cumissiun extraparlamentara da linguas. Fertant ch'il cussegl dals chantuns l'ha acceptada èsi vegnì refusà dal cussegl naziunal. – La PSR ha plinavant gi cumenzà cun la concretisaziun d'in inscunter per l'onn 2018. Quel sa drizza a persunas giuvnas e duai avair lieu quest atun en il Grischun central.

Mess paisa è era vegnì sin l'infurmaziun davart las medias rumantschas. La PSR è perquai era stada activa tar la discussiun davart l'avegnir da La Quotidiana ed ha cuntinuà cun la maisa radunda

ch'è alur vegnida midada en ina gruppa creativa per eruir tge avegnir che la Rumantschia vul en connex cun las medias rumantschas. Concernent Radio e Televisiun Rumantscha ha la PSR fatg part dal cumbat cunter l'iniziativa No-Billag en connex cun la votaziun surlonder. Ella ha perquai era prendì part il 1. da favrer 2018 – cun autras uniuns – sco conorganisatura da l'occurrenza musicala cunter No-Billag en la staziun da Turitg.

In project da la PSR è era da pudair realisar l'onn da scola 2018/2019 in barat da classas. L'idea fiss ch'ina classa sursilvana va per in'emna en l'Engiadina ed ina da là sin Surselva. Da preschent èn ins – cun sustegn da la LR – a la tschertga da magisters che fissan pronts per ina fasa da pilot.

Cuntinuà è vegnì cun l'acziun «Abunar La Quotidiana». Ensemen cun la Sotmedia ha la PSR regalà abunaments per in mez onn. L'emprima fasa è stada in success, main la segunda pervia dal futur intsichert da LQ.

La PSR ha era gi fatg part da la festa da giubileum 20 onns La Quotidiana, da la radunanza da LR e da la Saira rumantscha en la chasa federala.